

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA KAKANJ
Općinsko vijeće**

Broj: 01/1-2-Z/20
Kakanj, 30.12.2020. godine

Z A P I S N I K
sa 2. redovne sjednice Općinskog vijeća održane 30.12.2020. godine (srijeda) u maloj sali
KSC Kakanj sa početkom u 9:00 sati
(sažetak zapisnika)

Nakon intoniranja himne Bosne i Hercegovine 2. sjednicu Općinskog vijeća otvorio je Slaven Katičić, predsjedavajući Općinskog vijeća i pozdravio prisutne.

Prije početka sjednice i utvrđivanja kvoruma svečanu izjavu je dala Behija Kulović, vijećnica Naše stranke, jer iz opravdanih razloga nije prisustvovala konstituirajućoj sjednici.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Edin Aliefendić, Aldin Šljivo, Izudin Puščul, Nedim Mušija, Mejrema Purišević, Namir Talić, Mediha Mamela, Omer Musić, Izudin Hrusto, Nerma Aliefendić, Elvir Delibašić i Safet Šahman (**SDA**)

Ahmed Begić, Eldin Mijoč, Miroslav Spasojević i Vinka Aletović (**SDP BiH**)

Mirsad Tursum, Sabit Čehajić, Zerina Kovač i Fakir Ajdinović (**S BiH**)

Dževdet Huskić, Branko Češljčić i Behija Kulović (**Naša stranka**)

Enver Merdić i Mugdin Gorak (**SBB BiH**)

Adnan Čobo i Armin Bašić (**DF**)

Slaven Katičić (**HDZ BiH**)

Mujo Fafulić (**nacionalnih manjina**)

Odsutni vijećnici: Džemal Bečirhodžić (**SDA**)

Predsjedavajući je konstatovao da je na sjednici u momentu prijave prisutno 29 vijećnika i vijećnice, te da su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

Mirnes Bajtarević, općinski načelnik

Ferdo Mijač, sekretar Općinskog vijeća

Enver Kusić, sekretar organa uprave

Džihad Berbić, pomoćnik općinskog načelnika za finansije

Mirza Fazlić, pomoćnik općinskog načelnika za privredu, urbanizam i zaštitu okoline

Rešad Zaimović, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

Nurčo Kurtović, pomoćnik općinskog načelnika za imovinskopravne, geodetske poslove i katastar nekretnina

Nurudin Hrusto, pomoćnik općinskog načelnika za civilnu zaštitu

Bahrudin Arnaut, pomoćnik općinskog načelnika za opću upravu, radne i zajedničke poslove, lokalnu samoupravu i mjesne zajednice

Zijad Neimarlija, direktor Zavoda za planiranje i izgradnju općine Kakanj

Predstavnici medija:

NTV IC Kakanj
Radio Kakanj
„Kakanjske novine“

„Naša riječ“
„Kakanjlive“
„Kakanj-x“

„Kaportal“
„Klix portal“

Usvajanje zapisnika sa konstituirajuće sjednice Općinskog vijeća:

Predsjedavajući je zapisnik sa konstituirajuće sjednice Općinskog vijeća stavio na glasanje, te je isti usvojen sa 29 glasova za, bez glasova protiv i uzdržan.

Vijećnička pitanja:

Dževdet Huskić: je postavio dva vijećnička pitanja. Prvo zašto se pristupilo nabavci i montaži dva gradska displeja ako je ideja bila da se oni iznajme zainteresovanom ponuđaču i da li je u planu izmještanje displeja kod pješačkog prelaza jer ometa vidljivost vozačima i pješacima, te dovodi u opasnost pješake koji prelaze ulicu na raskrsnici kod srpske crkve. Drugo pitanje je da li je mobilna mjerna stanica za aerozagađenje u potpunosti ispravna i koliko su zaista ispravna mjerenja zagađenja zraka koja se očitavaju, te zašto naša mjerna stanica nije uvezana sa FHMZ kako bi mjerenja zagađenja zraka bilo moguće pratiti na zvaničnoj stranici Zavoda.

Eldin Mijoč: je postavio vijećničko pitanje o prosječno isplaćenim plaćama i toplom obroku za mjesec oktobar 2020. godine za JP „Vodokom“, JP „Grijanje, JU Dom zdravlja, JU „KSC“, JU Centar za socijalni rad, JU „Mladost“ i JU „Gradska biblioteka“ Kakanj.

Armin Bašić: je postavio pitanje zašto se kod izrade planskih dokumenata općine kao nosilac izrade ne angažuje Zavod za planiranje i izgradnju općine Kakanj, nego se za svaki projekat angažuju Kantonalni zavodi ili privatna preduzeća, te koje su po statutu ovlasti i djelatnosti Zavoda i zašto se koristi naziv „Zavod za paniranje i izgradnju“ ako isti ne obavlja djelatnosti iz svog naziva.

Vijećničke inicijative:

Eldin Mijoč: je podnio vijećničku inicijativu da općinski načelnik u Budžetu za 2021. godinu planira iznos od 1.000.000,00 KM za kupovinu kotlova na pelet građanima općine Kakanj zbog izuzetno zagađenog zraka, što se odražava na cjelokupni ekosistem, a naročito na zdravlje građana.

Armin Bašić: je podnio dvije vijećničke inicijative. Prva je da se formira stručna komisija za reviziju Prostornog plana općine Kakanj koja bi krajem svake godine podnositi izvještaj o stepenu realizacije prostornog plana i koja bi kontinuirano donosila i osnovne smjernice za provođenje prostornog plana kako bi se plan razvijao ravnomjerno i usklađeno na cjelokupnom prostoru općine Kakanj. Druga je da se trenutno aktuelnim izmjenama i dopunama Prostornog plana 2010-2030. obuhvate i druge površine koje su devastirane eksploatacijom rudnih i mineralnih sirovina, a koje više nisu predmet eksploatacije. Pri tome se prvenstveno misli na površine RMU Kakanj koje su ostavljene kao gole i sterilne na kojima vegetacija neće niknuti sama, kao i površine oko kamenoloma Greben.

Predsjedavajući je konstatovao da je vijećnik Namir Talić podnio vijećničku inicijativu bez korištenja govornice.

Namir Talić: je podnio vijećničku inicijativu da se u budžetskoj 2021. godini planiraju sredstva za asfaltiranje puta Vrhevlje-Jehice kako bi unaprijedili turizam na svim dijelovima naše općine, a posebno na Ponijerima, obzirom da je jedan od osnovnih preduslova ugodnog boravka na Ponijerima kako za kakanjce tako i za posjetioce iz drugih gradova, da su dobri i kvalitetni putevi i rasvjeta.

Utvrđivanje dnevnog reda:

Predsjedavajući je napomenuo da je prijedlog dnevnog reda usaglašen na sjednici Kolegija koja je održana po završetku konstituirajuće sjednice, te je za 2. sjednicu predložio dnevni red po pozivu. Još je naglasio da je predlagač povukao tačku 8. predloženog dnevnog reda „Prijedlog odluke o davanju saglasnosti na Odluku o izmjenama i dopunama Pravilnika o koeficijentima i platnim razredima UO JU za predškolski odgoj i obazovanje „Mladost“ Kakanj“.

Vijeće usvojilo dnevni red za 2. sjednicu sa 28 glasova „ZA“, bez glasova „PROTIV“ i „UZDRŽAN“.

Usvojeni dnevni red:

1. Prijedlog odluke o privremenom finansiranju Općine Kakanj za period 01.01-31.03.2021. godine
2. Izvještaj o izvršenju Budžeta Općine Kakanj za period 01.01- 30.09.2020. godine
3. Prijedlog odluke o vrijednosti boda komunalne naknade u 2021. godini
4. Prijedlog odluke o pristupanju izradi izmjena i dopuna Prostornog plana općine Kakanj 2010-2030.
5. Prijedlog odluke o pristupanju izradi izmjena i dopuna Urbanističkog plana Kaknja 2011-2026.
6. Prijedlog odluke o načinu i uslovima raspolaganja nekretninom – prodaji neposrednom pogodbom građevinskog zemljišta u Kaknju, označenog kao k.č.br. 1966/27 zv. „Površinski kop“
7. Prijedlog odluke o načinu i uslovima raspolaganja nekretninom – prodaji neposrednom pogodbom građevinskog zemljišta u Kaknju, označenog kao k.č.br. 1053/43 zv. „Dvorište za džamiju“

1. Tačka

Prijedlog odluke o privremenom finansiranju Općine Kakanj za period 01.01-31.03.2021. godine

Predlagač: Općinski načelnik

Obrađivač: Služba za finansije

Izjestilac: Džihad Berbić, pomoćnik općinskog načelnika

U diskusiji su učestvovali Eldin Mijoč, Dževdet Huskić i Edin Aliefendić.

Eldin Mijoč: je rekao da je politički neodgovorno od strane SDA što se predlaže Odluka o privremenom finansiranju, jer smatra da je raniji saziv Vijeća mogao usvojiti nacrt Budžeta kako bi na današnjoj sjednici bio na dnevnom redu prijedlog Budžeta. Pretpostavlja da će zbog kasnog usvajanja Budžeta za 2021. godinu kasniti sa usvajanjem i svi programi, pa u skladu s tim i realizacija sredstava. Iz navedenih razloga klub SDP-a neće podržati predloženu odluku.

Dževdet Huskić: je naglasio da će klub NS podržati predloženu odluku, te je pitao iz kojeg razloga se u izradi odluke kao osnov koristio tromjesečni prosjek utroška sredstava u prethodnoj godini koji iznosi oko 7 miliona KM, a nije iznos srazmjeran utrošku sredstava u istom periodu prethodne godine što iznosi oko 5 miliona KM. Ovo sve iz razloga što ne vidi prostor za optimizam imajući u vidu trenutna dešavanja u svijetu, pa tako i kod nas u vezi sa COVID-19.

Edin Aliefendić: je rekao da je SDA upravo suprotno stavu Mijoča, neusvajanjem Budžeta u ranijem sazivu Vijeća pokazala odgovornost prema građanima, jer se nije znalo ko će biti izabran za načelnika i sa kojim kapacitetom će koja politička partija participirati u Vijeću u novom sazivu. Iz tog razloga se nije željelo ranije ići u proceduru pripreme i izrade Budžeta za 2021. godinu.

Džihad Berbić: je istakao da je preko 40% sredstava u Budžetu Općine namjenska sredstva koja su izuzeta iz ograničenja propisanih zakonom, pa s toga neće uticati na stepen realizacije, odnosno neće biti problema u realizaciji rashoda.

Nakon rasprave Vijeće je usvojilo Odluku o privremenom finansiranju Općine Kakanj za period 01.01-31.03.2021. godine sa 25 glasova „ZA“, 4 glasa „PROTIV“, bez glasova „UZDRŽAN“.

2. Tačka

Izvjestaj o izvršenju Budžeta Općine Kakanj za period 01.01-30.09.2020. godine

Predlagač: Općinski načelnik

Obrađivač: Služba za finansije

Izjestilac: Džihad Berbić, pomoćnik općinskog načelnika

U diskusiji su učestvovali Eldin Mijoč.

Eldin Mijoč: je rekao da je iz Izvjestaja vidljivo da je izvršenje Budžeta za prvih devet mjeseci prošle godine bilo manje za 23,83 % u odnosu na plan, te da je ostvaren višak rashoda nad prihodima u istom periodu u iznosu od 36.569,36 KM, što govori da su sredstva trošena suprotno Odluci o izvršenju Budžeta. Iz Izvjestaja se također vidi da su sredstva za ugovore o djelu i povremene i privremene poslove realizovana u procentu od 87,43 %, pa je nejasno kako je za određene stvari bilo sredstava, a za druge nije. Rekao je da ima stavki koje su uredne i da nije cjelokupan Budžet trošen na takav način, ali isto tako ima još stavki koje nisu korektne, pa iz tih razloga SDP neće podržati predmetni Izvjestaj.

Nakon diskusije Vijeće je usvojilo Izvjestaj o izvršenju Budžeta Općine Kakanj za period 01.01-30.09.2020. godine sa 20 glasova „ZA“, 4 glasa „PROTIV“ i 5 glasova „UZDRŽAN“.

3. Tačka

Prijedlog odluke o vrijednosti boda komunalne naknade u 2021. godini

Predlagač: Općinski načelnik

Obrađivač: Zavod za planiranje i izgradnju općine Kakanj

Izjestilac: Zijad Neimarlija, direktor Zavoda

U diskusiji nije niko učestvovao i Vijeće je usvojilo Odluku o vrijednosti boda komunalne naknade u 2021. godini sa 26 glasova „ZA“, 3 „PROTIV“, bez glasova „UZDRŽAN“.

4. Tačka

Prijedlog odluke o pristupanju izradi izmjena i dopuna Prostornog plana općine Kakanj 2010-2030

Predlagač: Općinski načelnik

Obrađivač: Služba za privredu, urbanizam i zaštitu okoline

Izjestilac: Mirza Fazlić, pomoćnik općinskog načelnika

U diskusiji su učestvovali: Eldin Mijoč, Dževdet Huskić i Armin Bašić.

Eldin Mijoč: je rekao da se u predmetnoj odluci o izmjeni i dopuni Prostornog plana općine Kakanj 2010-2030. između ostalog navodi i gradnja MHE na rijeci Ribnici. Rekao je da ga to iznenađuje obzirom da je poznato da je Parlament FBiH usvojio zaključak o zabrani gradnje malih HE na cjelokupnom području FBiH, te da je Vijeće u ranijem sazivu odbilo dati saglasnost za gradnju MHE na rijeci Trstionici. Osim toga, ne slaže se sa prijedlogom teksta odluke koji govori da će se predmetna izmjena planske dokumentacije finansirati iz sredstava Budžeta Općine Kakanj, te sredstvima podnosioca zahtjeva Elektroprivreda BiH i „Trgošped“ Kakanj, jer smatra da bez obzira o kojim se privrednim subjektima radi, oni ne trebaju da finansiraju izradu dokumentacije koju je obavezna izraditi Općina. S toga je tražio da se prethodno navedeno briše iz prijedloga odluke.

Dževdet Huskić: je rekao je shvatio da se predloženom odlukom pristupa izradi izmjena i dopuna Prostornog plana općine Kakanj 2010-2030., a ne da se njome usvajaju izmjene. Smatra nespornim da plansku dokumentaciju treba revidirati i po potrebi mjenjati, ali da svakako treba posebnu pažnju posvetiti pitanju izgradnje MHE na rijeci Ribnici, koja je već gotovo u cijelosti uništena. Složio se sa prijedlogom Mijoča da privredna društva ne trebaju učestvovati u finansiranju izrade izmjena prostorno planske dokumentacije.

Armin Bašić: je napomenuo da je na tekućoj sjednici podnio vijećničku inicijativu da se u obuhvat predmetnih izmjena planske dokumentacije uvrste i druga devastirana područja općine, prije svega ona koja su ostala napuštena nakon izvođenja rudarskih radova.

Mirza Fazlić: je rekao da je vijećnik Huskić u najvećoj mjeri odgovorio na diskusiju Mijoča, te je dodao da Služba ne pravi selekciju pristiglih inicijativa, nego se sve daju u proceduru nakon koje se inicijative mogu usvojiti ili ne usvojiti ili djelimično usvojiti. U pogledu finansiranja izrade planske dokumentacije je rekao da je to zakonska mogućnost, pa je u tom kontekstu predložio da se odluka ne mijenja, već da se Protokolom definiše da će trošak izrade planske dokumentacije ići na teret Budžeta Općine.

Vijeće se prije izjašnjavanja o Odluci izjasnilo o prijedlogu vijećnika Mijoča da se iz prijedloga briše dio koji predviđa izgradnju MHE Ribnica i dio koji se tiče finansiranja projekata od strane privatnih preduzeća koja su inicirala predmetne izmjene. Vijeće nije usvojilo ovaj prijedlog sa 7 glasova „ZA“, bez glasova „PROTIV“ i 20 glasova „UZDRŽAN“.

Vijeće je usvojilo Oduku o pristupanju izradi izmjena i dopuna Prostornog plana općine Kakanj 2010-2030. u prijedloženoj formi sa 23 glasa „ZA“, 4 glasa „PROTIV“ i 2 glasa „UZDRŽAN“.

5. Tačka

Prijedlog odluke o pristupanju izradi izmjena i dopuna Urbanističkog plana Kaknja 2011-2026

Predlagač: Općinski načelnik

Obrađivač: Služba za privredu, urbanizam i zaštitu okoline

Izjavitelj: Mirza Fazlić, pomoćnik općinskog načelnika

U diskusiji je učestvovao Dževdet Huskić.

Dževdet Huskić: je podržao donošenje odluke i pristupanje ovom poslu, te izrazio uvjerenje da izmjene Urbanističkog plana neće biti kozmetičke prirode, odnosno da se u pozadini krije razlog za izmjene Plana. Također, naglasio je da je tokom cijele procedure vrlo bitno držati se smjernica navedenih u predmetnoj odluci.

Nakon diskusije Vijeće je usvojilo Odluku o pristupanju izradi izmjena i dopuna Urbanističkog plana Kaknja 2011-2026. sa 24 glasa „ZA“, bez glasova „PROTIV“ i 4 glasa „UZDRŽAN“.

6. Tačka

Prijedlog odluke o načinu i uslovima raspolaganja nekretninom – prodaji neposrednom pogodbom građevinskog zemljišta u Kaknju, označenog kao k.č.br. 1966/27 zv. „Površinski kop“

Predlagač: Općinski načelnik

Obrađivač: Služba za imovinskoppravne, geodetske poslove i katastar nekretnina

Izjavitelj: Nurčo Kurtović, pomoćnik općinskog načelnika

U diskusiji su učestvovali Eldin Mijoč i Armin Bašić.

Eldin Mijoč: je prigovorio na način prodaje predmetne parcele, jer se predlaže prodaja neposrednom pogodbom. Pitao je zašto se prodaja ne obavlja putem javnog poziva, te je rekao da smatra da ovakvim načinom prodaje želi izaći u susret, što se ne bi trebalo dešavati. Još je rekao da se u odluci navodi da se prodaja vrši radi oblikovanja čestice, a da po njegovom mišljenju u konkretnom slučaju nema nikakvog oblikovanja.

Armin Bašić: je napomenuo da je u prvom redu insistira na zakonitom postupanju, a da je prodaja neposrednom pogodbom jedan od zakonskih načina prodaje. Uz to je rekao da ukoliko u okviru zakona postoji mogućnost da se pomogne razvoj poduzetništva, da je on u svakom slučaju za takva rješenja, pogotovo ako se takvim postupanjem skraćuje procedura rješavanja stvari.

Mirza Fazlić: je napomenuo da je oblikovanje čestice posao urbanizma, te da je jedini razlog zašto se ide u prodaju neposrednom pogodbom činjenica da predmetna parcela nema pristupni put, a što je

zakonski uslov za prodaju putem javnog poziva. Naglasio je da će se prodaja izvršiti po cijeni koju odredi vještak u svojoj procjeni, a ne putem nekog dogovora ili pregovaranja.

Nakon diskusije Vijeće je usvojilo Odluku o načinu i uslovima raspolaganja nekretninom – prodaji neposrednom pogodbom građevinskog zemljišta u Kaknju, označenog kao k.č.br. 1966/27 zv. „Površinski kop“ sa 26 glasova „ZA“, 1 glas „PROTIV“ i 1 glas „UZDRŽAN“.

7. Tačka

Prijedlog odluke o načinu i uslovima raspolaganja nekretninom – prodaji neposrednom pogodbom građevinskog zemljišta u Kaknju, označenog kao k.č.br. 1053/43 zv. „Dvorište za džamiju“

Predlagač: Općinski načelnik

Obrađivač: Služba za imovinskopravne, geodetske poslove i katastar nekretnina

Izjavitelj: Nurčo Kurtović, pomoćnik općinskog načelnika

U diskusiji nije niko učestvovao i Vijeće je jednoglasno sa 27 glasova „ZA“ usvojilo Odluku o načinu i uslovima raspolaganja nekretninom – prodaji neposrednom pogodbom građevinskog zemljišta u Kaknju, označenog kao k.č.br. 1053/43 zv. „Dvorište za džamiju“.

Predsjedavajući je zaključio rad 2. sjednice Općinskog vijeća u 10:20 sati, uz čestitke građanima i vijećnicima za Novu godinu, te čestitke pravoslavnim vjernicima predstojeći Božić.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR
OPĆINSKOG VIJEĆA**
Ferdo Mijač

**PREDSJEDAVAJUĆI
OPĆINSKOG VIJEĆA**
Slaven Katičić